

晚

晴

移

詩

匯

晚晴簃詩匯卷七十八目錄

王心敬 三首

曹庭棟 九首

馬翮飛 四首

陳景元 九首

嵩山 二首

峒山 一首

甘運源 十五首

甘運瀚 三首

吳穎芳 二十七首

陶元藻 十一首

趙一清 一首

沈大成 八首

舒夢蘭 九首

周準 四首

盛錦 五首

高鳳翰 七首

上官周 一首

方士庶 二首

汪士慎 一首

閔華 四首

錢夢鈴 八首

張錫爵 三首

張四科十首

晚晴簃詩匯卷七十八

徐世昌

王心敬字爾緝號豐川鄆縣人諸生乾隆初舉孝廉方正有豐川集

感興

坐久林風發翩翩吹予袂悠然有會心乃在山東際陟岫
望鄒魯渺渺目難繼豈必道遠長哲人早已憩徘徊歧路
側日午陰未霽浩歌淚盈把寸心將何寄歸來濯玉女天
空白日麗

秋夜

一心甘猷猷念載卧茅廬不計勦名晚何知歲月除更深
滋露冷月朗逼星疎頭白明鐙裏優游尙著書

感秋

何事浮游似夢游西風吹鴈又林邱半生空負千秋志一
夜常懷萬古憂芳樹望中驚落葉碧溪眼底瀉寒流白頭
看破歷來妄且摘黃花當酒籌

曹庭棟字楷人號六圃嘉善人貢生乾隆初舉孝廉方
正有產鶴亭詩藁

法梧門曰吳孟舉刻宋詩鈔近日嘉善曹六圃復有
百家詩存之刻余亦從四庫全書中鈔宋人詩百餘
家皆孟舉六圃所未見者六圃詩大似北宋人居東
園有佛阜鍵戶著書三十年所坐木榻穿而復補於
城北門外里許築生塲旁架屋顏曰永宇溪莊繞塲
種梅花成林袁子才曰六圃蓼懷少宰之孫隱居
不仕自號慈山居士著作甚富余愛其晚年佳句如
廢書祇覺心無著少飲從教睡亦清病教揖讓虛文
滅老覺婆娑古意多余稱其詩專主性情六圃
圃寄札謝招余往竟不遂卒已八十五矣
詩話六圃中年後絕意進取嘗於所居累土高數丈
環植花木奉母命曰慈山因自爲號著有易準孝經

通釋逸語昏禮通考琴學內外篇詩有魏塘紀勝續
紀勝絕句百六十餘篇標舉鄉里名勝以風雅存文
獻用小長蘆釣師
鴛鴦湖權歌例也

秋燕

如客漂搖不自禁
落花故巷尙追尋
疎簾清曉差池影
細雨黃昏去住心
舞徧空庭人寂寂
語殘涼夢月沈沈
鬱金堂上驚秋蚤
愁絕雙棲伴獨吟

外弟郭和叔自涿州來話舊爲賦短歌遙呈外舅竹
溪先生

聞君千里至驚喜
屣爲倒接面未一揖先問阿翁好
阿翁別我五載強拂衣卜築西山旁
滾滾歲月蛇赴壑應知添得鬚
肩蒼閉門人事了不擾臨池卻費閒
中忙日日擘窠寫大字臂挽弩弓雙
瞳張雄心豪氣逼年少咄咄自歎餘

熱腸幽棲未斷終老計白雲紅樹增蒼涼噫吁嚱人生得
一間萬事莫與敵富貴祇從想像佳況翁一一都身歷歸
休乎勿復疑朝衫改製田夫衣春泥滑滑躬鉏犁青蔥滿
畦菜甲肥呼酒一醉情熙熙祝翁樂此終不移太平亦有
賢之遺狂言莫訝多橫溢此意纏綿藉君述有人問訊阿
翁家指點西山山桃花

陳賢良隱居

清風涇舊名白牛村市元易爲鎮曰風涇鎮因宋陳舜俞罷官後隱居於此故

名舜俞自號白牛居士因村而名

湖洞渺渺挹清風遙在篁墩東更東

篁墩庵俗稱荒墩庵在九南區中爲表賢

祠以祀賢良

想得柴門煙靄裏白牛閒卧綠楊叢

遯溪

前明錢相國塞庵築別業於北郊之北暑圩曰遯溪中有鱗月堂取李文山玉鱗斜月之句

勝國風流宛在茲殘山賸水憶棲遲劇憐促膝鬚眉古鱗

月堂前話舊時

梅花渡

西郊寒字圩明支甯暇別墅名梅花渡地廣五十畝種梅千樹流水繞之其渡處曰鷺行

橋有春雨軒軒廢其會孫期移舊額榜於書室

香雪消殘煙草平鷺行橋畔鶉鴝鳴小軒易地聽春雨寒

瘦一枝牆角橫

西村

西塘鎮之北二里許舊名鄔家村者先大父少宰公賜塋在焉大父幼孤遺命與先會大父母

合葬廬墓數椽題曰西村因御賜詩中有西村有叟入城去之句適在西塘鎮敬摘西村二字以名

其地

錫類恩霑歿後身

錫類堂御題書賜先少宰者

松楸交映石麒麟未知

繩武今何似慚愧青衫拜墓人

查家蕩

築城涇諸水北流入蕩蕩水清淺土人栽藕爲業花開時紅白交映如錦畫舫笙歌遊賞

絕不

灘頭卜築誰家屋
渺沔澄波以姓傳
蓮葉盡消蘆葉長
數聲漁笛咽秋煙

瑞竹居

毛仲和居邑之容川隱居奉母庭中栽木香花一本斷竹爲架至春枯竹忽生枝葉更抽

新筍時稱爲孝感構屋三楹顏曰瑞竹居

壓架香添滴翠新
背時殘朽咤回春
煙枝風葉無多景
珍重栽培待後人

邊月

營門獵火夜深稀
一鏡初懸霜亂飛
荒磧到天人影小
翔雲連海雁痕微
牙旗暗閃嚴金鑰
毳帳孤開冷鐵衣
無相封侯空憶得
龍沙萬里奉清輝

馬翮飛字震卿號一齋桐城人
乾隆初舉孝廉方正有
翊翊齋詩文鈔

山園卽事

曲徑穿林口層巖接石梯到門青嶂合坐客白雲齊雨歇
泉初響花飛鳥自哢向來耽野趣何日遂深棲

月夜至玉屏庵

古寺翠微間溪山契悠想明月下庭除忻然遂獨往春谿
漾素輝寒松落幽響繁陰漸迷離疎影散林莽一徑薜蘿
深拄杖緣蘿上高僧夜未暝開軒共澄朗坐久若有得無
言倚虛幌

太白樓

黃葉一天秋青山百尺樓樓頭舊時月夜夜照江流

晚泊

寒潮秋淦淦落葉晚瀟瀟借問停橈處吳楓第幾橋

陳景元字石閭漢軍旗人有石閭詩集

詩話石閭貞抱淵懷不求聞達遂以布衣老與李眉山戴逵堂稱遼東三布衣盧雅兩爲合刻其詩石閭自言詩宗兩漢欲自拔於儕輩之上其所成就乃在郊島間戛磬鳴琴故自不同流俗

雜詩

句漏有丹砂葛洪因得仙及我更經之但見牛羊眠圭江
絕流水鬱林互青天朝發白沙洞暮宿鬼門關鬼門多異
獸捕獲誇雄蠻猩猩願我哢猓獠不可干生死在山谷何
必能人言歧路迷所向慘切游子顏人馬俱變色喟然心
脾酸

扁舟發金閭乘流至吳興吳興古都會柔桑環水城四月
育新蠶室家俱不甯弱羽拂蠶子但恐傷其生夜深闕鐙
火時聽食葉聲纈絲貴白素落釜乞餘盈經緯爲誰理絲

絲辛苦成婦子熟籌計可以代春耕束縛未遑售里吏扣柴荆

蒼鷹行

秋風瑟瑟生金聲蒼鷹力勁筋骨輕愁胡怒視氣縱橫草木益深眼愈明銛鋒利劍十二翮走電飛雲八千尺扶搖不讓凡鳥先攫拏豈借他人力存身韝上已三年雄姿磨滅心膽寒庖廚供肉日漸缺條鏃相纏未假寬狐狸登牀狼叫野搏擊誰爲驅役者請君縱逸凌九天萬里長風側身下

蹴毬行

十月嚴霜至月雪長安城河凍如鐵騏驎空餘絕足能騰鷗遠避陰風烈羽林健兒不騎馬短後衣裳正輕跨毳毛

白黑各分曹蹴踏層冰爭白打來如奔電流光赤去若飄
風走飛石后羿彎弓九日沈宜僚運掌雙丸擲奮袂喧呼
不自知斷筋折骨何能惜本是尋常舊相識一朝攘奪如
讐敵逞雄作氣貴持盈性命此際鴻毛輕倏爾趙軍立漢
幟下風稽首甘輸誠平生未授縛雞力龍淵在匣神光匿
白首下帷誠可憐相對無言三歎息

登樓

思鄉不可得悵望倚高樓一道黃河水羞隨白髮流雲靈
失故渡波惡斷行舟隔岸聞漁唱蕭蕭起暮愁

觀潮

一綫從空下翻飛十萬尋地非句踐業潮見伍胥心草木
無今古蛟龍變淺深此時隔江女猶善作吳音

經華陰望嶽

華陰南望華峯雄，互嶽渾疑天路通。
玉女洗頭乘夜露，巨靈舒掌逆秋風。
山光直走秦關北，地脈遙連渭水東。
一自神祇承漢祚，寂寥封禪夕陽中。

邊笛

秋風吹雨過桑乾，羌笛何來怨夜闌。
多少健兒顏色改，荷戈齊向月中看。

一聲初歛柳梢青，駐馬凝思舊別情。
欲向關河望故國，紛紛黃葉落長城。

嵩山字伯仁滿洲旗人有餘廉堂集

詩話伯仁自號養易齋居士，爲韜明男爵子，與弟仲仁皆工詩。伯仁身嬰痼疾，久處閒佚，雲山煙水因寄所託，悉寓於詩，脩然有清拔之致。

初夏午後睡起

初夏雨露重園林濃翠滋
嘯鳥不知名去來無定時
蟬音動高柳藕葉生淺池
晚花弄餘香幽竹稀俗姿
晝長午睡足屋影移階遲
老幸終日閒安意何所爲
悠然飲北窗消受薰風吹

游山途中作

動卽就幽蹟罕辭山路遙
人尋芳草渡煙斷夕陽橋
入谷花相迂隔林僧見招
禪庵知不遠一磬出雲霄

峒山字仲仁滿洲旗人有柏翠山房詩

秋眺

秋景未蕭條霜華夜半凋
草枯山露石溪漲水平橋
白雁排空唳青帘隔岸飄
依然摩詰畫誰擬輞川描

甘運源字道淵漢軍旗人官英德象岡司巡檢有嘯崖

詩存

詩話道淵夙負詩名沈淪一尉幾與常吁貽賈長江
相類治亭尚書與相善嘗贈以詩云就官爲救窮升
斗計微利一朝墮宦海窮病更日漬所賴詩膽豪牢
籠盡萬類狂歌老不休天地容酣醉詩涂轍旣正風
骨復道行輩視絮眉山遂堂石閣諸家
略後至其所作殆有過之無不及也

夏日讀書

城柝送繁響疏鐙耿殘炷夜涼時雨清流螢坐深樹時聞
嘒嘒蟬乍咽娟娟露簾虛方影垂月色忽已素天機旣高
張澄懷本同趣手把一卷書清吟奏韶韻

巫山縣北行是峽背最高處也

連嶂互峽背重巒悉隩阻廉利削堂皇豐隆積廩庾石齒
鑿精鏐千仞無負土空騎盡喘汗行人病僂僂拔地躡丹

梯到天不尺堵遙指岷江蟠微茫白一縷時見巨壑雲去
作陽臺雨

余以索紙詩呈耕南大蒙鑒賞兼辱和贈因疊韻奉

酬

致身朝宇吾無媒飢寒驅去猶攻詩藩溷悉置筆與紙幾
年畫虎得其似辛苦不如田舍郎風塵奔走顏無光吟哦
無益坐自困臧穀殊業羊均亡有時得句發狂笑喜溢太
宅眉揚揚先生愛我亦有癖親爲刪詩揀砂礫我詩對君
乃真貧君富倉箱我儋石往年詞賦奏相如君舉鴻博科徒令
買犢遺其珠組纂風華勿事渠留意名山金匱書

長平箭頭歌

秦人用兵眞虎狼銳頭之銳不可當擊坑趙卒四十萬殺

入無異刳羣羊非秦坑趙趙括讀父書猶不了憶昔
跨馬出長平飛沙颯颯心暗驚骷髏如山戰場處高平縣長平驛
有骷髏山天陰白骨聲咿嚶鬼馬驍騰鬼雄哭耕夫堡土收遺
鏃觚棱三角如棗穰寸銅一躍千年綠血鏽殘齧不磨
心傷到眼手摩挲夜深月黑磷如豆想像昔日飛蝗多座
客傳觀起太息甘生爲爾歌疇昔周衰王不御明堂五霸
兵車逞威力七國咆哮逮暴秦憑陵起翦成蠶食其臣武
安尤不仁杜郵一劍天怒嗔君不見新安降卒死排堵前
有亡秦後亡楚

寓樓客感

賦詩憐短鬢伏枕感深秋雨氣侵孤榻江聲到小樓雲開
山變幻楓冷日清幽怪底棲霞客丹成汗漫游

道經龍泉山憑高縱目而作

放眼凌秋壑，高空更一攀。
蠶叢千里國，鳥道百盤山。
落日在鴉背，流雲出樹間。
人煙雪嶺外，彷彿盡諸蠻。

秋夜

露坐空庭戶，半扃婆娑叢。
樹月冥冥繞，枝烏鵲飛三匝。
隔水孤螢墮，一星天影盡。
從雲外白浮煙，都入竹間青。
紅菱碧藕新供饌，笑與家人索酒瓶。

西坪

路繞西坪舊徑斜，疏疏籬落幾人家。
青蛇夭矯上茅竹，黃蝶飛翻出菜花。
江霧夜寒生瘴癘，石田春盡少桑麻。
乍來遠客懷鄉土，睡起空階數晚鴉。

春日偶然作

牢落眞慚世上名，詼諧詞賦尙縱橫。豈無武帝憐方朔，亦有文君愛長卿。楊柳陰陰飛白鷺，桃花黯黯叫倉鶩。人生不守酒泉郡，慚愧廚頭阮步兵。

春日夏寶梁招飲醉後賦呈座中汪顧二君子
日日春愁似海寬，倒衣趨我暫爲歡。不辭小戶拌蕉葉，漫倚雄心舞蔗竿。京國樓臺銜返照，東風花柳怯餘寒。酒邊痛飲應劉在，青眼於今一倍難。

北口道中覽古

關勢雙迴舊壘間，昔人設險控三邊。磧通北狩盧龍路，山見西來白馬年。雁塞風高天似洗，渝河春盡草如煙。不須鳴劍馳長想，一瞬興亡幾逝川。

巫山

巫山倚白雲雲畫巫山斷舉頭聞猿嘯忽見巫山半

江上逢人入川

我從峽中來君向峽中去若聽清猿嘯是我來時路

聽彈琵琶偶成一絕

酒懷依約想當年倦倚交牀聽四弦最愛隋唐宮調穩晚涼風定落花前

酒肆走筆戲贈汪蒼巖

君知我憶蜀山岑斗酒殷勤話別心今日座中無李白桃花潭水向誰深

甘運瀚字子灝漢軍旗人有舞蔗軒橐

詩話子灝早歲能詩與道淵齊名卒時年未三十詩五七古音節諸類近體皆明前後七子格調未能盡化畦徑則年限之也

讀伯氏長江萬里集題後

禹貢導江自岷山西來一氣蒼莽間荆門郢樹瞬息至直
下萬里東吳船客程計日不辭遠兩岸猿聲楓柏晚側身
西望一懷歸巫峽迢迢在天半乘興還爲吳會吟煙花三
月愁春心莫戀東南照初日高歌西北雲沈沈

憶伯兄

隙駒不肯駐駛景感深情兩地俱歲暮一心愁月明相思
及關塞獨立倚軒楹有酒那堪把芳樽徒自盈

山城

蕭瑟山城景憑欄動客愁溼雲閒晚雨落葉釀深秋地僻
吟情迴寒多酒力柔不堪搖落意清夜獨聞謳

吳穎芳字西林仁和人臨江鄉人詩集

王蘭泉曰西林先生居仁和臨江鄉因自號臨江鄉人其稱名於釋氏則曰樹虛先生務爲專一之學讀一書則研窮一書之底蘊竟其業而後及他書故積其生平博覽羣籍而所究心有得者數藝而已嘗怪鄭氏夾深之著書務與先儒爲難詆譏過當而持論反有所偏于是取二十略中之六書七音樂略一尊先儒而探其源其用力則自樂始成吹幽錄五十五卷次及六書成說文理董四十六卷因六書而及音韻成音韻討論四卷又因說文而考制字之原成文字源流六卷又取鐘鼎文字成金石文釋六卷皆著述之大者爲詩不厭數改由淺而及深去粗而存精編爲臨江鄉人集四卷儒書之外兼通釋典其他術數之屬皆

有論列

詩話西林詩自敘曰詩有章法古人所謂或製首以通尾或尺接而寸附也有脈理之貫通古人所謂買一爲拯辭之藥也是以去累則成篇合法則入格如端綺然經緯分明邊幅平正無紕無類斯爲佳製又曰古人讀書不專務詞章偶而流露謳吟僅抒所蓄之一二其胸中淵乎莫測也遞降而下傾瀉漸多逮至元明以十分之學作十分之詩無餘蘊矣次焉者或溢其量以出故其經營之處時露不足如舉重械雖同一運用而勞逸之態各殊古人勝於近代可準是以觀之西林與杭厲同時各有專長其詩如水碧

金膏自然清麗有過於瑀刻者爲勇次之樸學
詩惟此數子非社集標榜一流所可擬已

田園雜詩

田鄰聯一心伐礮赴私役負耒趨南疇挾鍤走下澤計日
耦耘耔互爲主與客白荀供朝餐紫薑充晚食良苗仰天
功人事不墮績長慮夏秋交旱苦旬朔劇桔槔叫飢鴻禾
狀有得色歸塗含多欣緩步濯溪碧水去橋下鳴月來樹
顛白洗酌坐廣庭滿意卽爲適

自郭以及遠先後治禾稼向賃下瀝田翦茅築丙舍雖遲
未違候迨此人力假連塍次第舉夙戒赴侯亞皇天施平
均恩澤慳情者旁人嗤我勞什一利可射君謀自長策我
計豈中下

水檻

對水可終日望雲生遐心端居翫物化無悶樂在林遙幃
涼雨歇坐見西山岑霽氣落虛牖柔風吹寶琴因之寄清
酌擁膝滄浪吟

入桐廬港懷張山人

由水渺何極扁舟相因依偶隨意所愜遂與清風期昭貌
嵐光晚夷猶蘭櫂遲崖阻若無路鳥去隨所之孤客拭塵
目遐心攄幽思沙洲拾芳草靜谷搴紫芝爲耽沃州隱願
與泥塗辭夜榔松下月朝灑磯上絲流泉寄輪委浮雲惜
分離陽光西望旻歎息方自茲

花桐塢

雲隱黃鶴峯秋江送潮雨心結祇樹園霞標壯山宇釋子
宿忘形游息欣有主花亭暝孤煙鹿跡散春塢垂枝翠結

絡傾泉珠貫縷深峪覲高隱雅性松桂侶言深冥至道境
靜入太古相偶不能歸偕游物之祖

和陸端門吳小仙雙松

吳仙落筆皆俊氣濃淡平奇得胸意召取蓬萊脫角龍蟠
曲張鱗對相戲拗怒噴薄煙霧青千山老幹無好形皮毛
幾伐現眞骨塵垢擺脫通仙靈扶苓長生化精魄齊弟夷
兄共肥瘠世遙韋畢未可知凡手安能論什伯數背一老
蹲若睡海雛所化或者是總歸元氣鴻濛中太初太素將
無同秋山斤斧無朝莫令人南憶閩甌路赤城雁宕不難
求布襪青鞋遠尋去

雨中湖樓送客

三丈旗竿曳紅尾游絲網春留客子碧樹交窗浸碧陰涼

雨斯斯葉頭駛浥溼柳花波浪肥亭角光竄銀絲飛高樓
有酒不能醉可惜栗留金畫衣嬉風席展洲蘋上迎船綠
簸漫天浪客情忽緬謝公遊五兩東隨釣溟漲

程氏館聽琴送黃海胡子

南浦別多憔悴深叩檻忽聆丹鳳吟掌上十指有長短坐
客滿堂誰會心認得縹緗幾行字大匠注眸不相棄劍芒
已露幽壤光感激臨行灑秋淚客懷醉攪如亂沙寸心愁
謝霜後花江亭欲雪未成雪三十六峯寒到家橫蹙吳山
截江路離魂尙戀煙郊樹擲杯起柁日落遲灑落沙風送
愁去

蕭尺木畫竹

畫叉高展秋旒褱磊落長身一區玉天風吹我過衡湘彷彿

徧青巖白沙曲名手宋文元仲圭古勁筆力挽與齊卽今
畫欠鐵鉤鎖莖鴛葉鈍俗不醫良朝客滿東軒外起立如
牆開眼界梢長便欲破屋椽室小簷低不容挂枝枝葉葉
竹意中無枝葉處皆清風湯餅火急作蟹語瞪視大幃空
復空細思似有百怪助妙在無意非人工南溪上品瀟湘
種愁絕煙林什伯叢

石田翁長卷

牋麻卷素積老屋中山卯君供不足翁因興到墨怒飛決
水驅山置橫幅洞庭微茫三峽險蒼梧雲重衡湘掩靜聽
深竹有猿聲直上長空散鴉點九州一塵滴筆端營邱洪
谷優劣難出奇變幻意無盡妙處歸宿臻幽閒臨流結宇
柴門現下入山光波澱澱石林迴轉凡幾重小徑蛇蹤飄

似綫百年絹素完無壞欲購空囊思舉債胸中塵歲洗盡
空飽歔慕羹長看畫

卽事寄山中故人

莎排綠鏃如繡銅秋深原野生素空百年匪遙直鶉鷄我
懷悠悠天地中落日清江照華髮沈吟坐看孤雲沒老松
屋頂吹天簫苦竹籬邊侵涼月白水環城淡若掃無人行
地風吟草西南古翠一峩天岑寂幽人卧春老

送客往西江理別業

行李趨南服江流送北船白蘋彭蠡澤春稻楚人田家計
魚登課山書竹有年懸知鄉國夢長在晚鴻先

寄湖南友人

使幕淹留久高懷近若何秋生漢陽樹涼入洞庭波林箐

猿吟數湖田雁跡多書堂佳月色荒盡綠垂蘿

西園梅花下得句

一鳥唱晴色西園花亂開詩成向天笑酒熟無人來挂帽
紫筠竹橫琴白石臺胸中千古意寫作松風哀

寄楚公

江上秋來伴因游憶約公翠連天目頂流盡海門東鶴步
孤無侶雲蹤澹入空蘋洲積幽夢艇上一絲風

和翟晴江

林禽下流暮村外見來煙晚照侵山郭秋陰傍渚田聞蛩
先得句看月不成眠念子能高枕區中絕世緣

和徐伯吹先生寄吳興友人

綠髮監州冊府歸驛程千里寸心違吳臺春暖蟻蛭甲茗

水煙烘翡翠衣斂翻鎮看霄漢碧引吭誰羨稻梁肥高人
爲取垂竿意淨掃苔溪白石磯

畫竹

心匠親摹煙雨姿蕭蕭數竿臨水湄中有子規呼不得奪
得湘川古魂魄秋涼曲室烘茶煙美人對展離騷篇寄賞
有情風月夜一叢疏綠小簷前

由湖隄入赤山路

醉入青林路幾迷蠻童從挈玉偏提東風減力飛紅緩夕
照懸愁蹙黛低波淺漉魚分界竹雨餘盤馬惜障泥此生
合向煙霞活乳洞高層覓翠梯

宿山中絕句

乘月渡溪晚谷口觸煙入鐙明知有人茅齋隔松葉

煙生杜若洲。水上唱彎檣。鐘動到門初。青林灑佳雨。
沙平半湖日。迴橋草舍低。小籬人聚影。醺酒祝春雞。
傳言小山花。蟪蛄聲未歇。巖中一夕寒。雲衾抱秋月。

橫涇村舍

玉杯初罇小池蓮。村酒經蠶味可憐。移過林端檣子子。碧
沙洲外水搖天。

題壁

貯酒西風破冷初。藕花閑館鱸鱸魚。年年襦袂裝新絮。一
瓊秋鐙夜讀書。

過西川書堂

水玉清談勝一時。梓花蘭草憶佳期。矮窗掩盡西池晚。殘
月依依上竹枝。

江上題壁

昔年銀壁草題詩柳掩新樓出酒旗郭外煙昏風捲盡拍
天波浪睡漁師

陶元藻字冕亭號篁村會稽人貢生有泊鷗山房集

王蘭泉曰篁村五十年前老名士乾隆丁丑余在廣
陵時盧連使見會大會吳越名士於紅橋凡六十三
人篁村與焉有詩云誰識二分明月好一分應獨在
紅橋爲時稱誦余贈以詩云勝游共聽歌三疊清詠
先傳月二分

詩話篁村詩格不高而才分充足情味蘊藉在越中
同時足與商賈意相抗袁簡齋傾倒其良鄉題壁詩
和作云手疊花箋鈔葉去天涯沿路訪
斯人後乃訂交蓋兩人詩亦相沆瀣也

過柏林寺觀吳道子壁間畫水作長歌誌之

君不見東南大地之水稱汪洋遠趨日本連扶桑畫師要
與元衣使者關驅入趙州東郭祇園牆汨汨汗汗失涯涘

一筆兩筆分低昂衝騰怒轉勢倔強陡然起立波爲揚我
聞江深五里海十里今此下窺無底誰能量回頭忽見墨
痕變馮夷氣靜開生面慈航寶筏來有無尺咫蓬萊水清
淺浪皺靴紋削可平并刀翦取澄江練長康漫誇元武宮
思訓羞傳大同殿學道曾參觀水術探奇復作畫水歌良
工下筆畏缺漏文水武水胥包羅願以天瓢汲決潏用澆
半生胸中抑塞不平之坎坷憶昔南浮淮泗北涉洪河乘
風欲破萬里浪大力橫截生龍鼉胡爲乎萍流梗泛隨秋
波珊瑚生枝不在網圓折方折誰觀摩浮槎有人天上去
中洲無梁那得過吳道子吳道子但知畫水焉知他吾其
衰病嗟蹉跎水平水平奈爾何

題良鄉旅舍

滿地榆錢莫療貧。垂楊難繫轉蓬身。離懷未飲常如醉。客
邸無花不算春。欲語性情思骨肉。偶談山水悔風塵。謀生
銷盡輪蹄鐵。輪與成都賣卜人。

彈子磯

高稜刺青天。根腳挂水府。盤渦潛毒蛟。昏黑神所怒。迴波
拒行舟。篙者力如虎。懸崖側欲頽。尾髮時一豎。妖星兆漢
年。刃血赭南土。彈射峯巒穿山靈。亦遭侮。茫茫太古雲流
石。氣成雨。峭壁羅青紅。妙繪色惟五。凌濤駕飛梁。欲陟絕
步武。松風餞孤舟。交影日卓午。

英德峽

山色何青蒼。一水通百粵。幽巖去復迴。中有帆出沒。幾片
無心雲。時來渡頭歇。鱗鱗波有容。齒齒石多骨。回頭歸路

迷前望更突兀旨哉古川原紅塵豈能越惜無郭橐駝種
此煙霞窟

大廟峽

天險何曾禹貢陳白波江上起嶙峋花垂孤石春迎棹珮
響空山夜降神玉馬驚迴猿洞火寒潮拍盡女牆塵帆飛
三峽行纔半還傍香爐一問津

謁南海神廟百韻

涵天溟漲百粵東瀾漫漶涵浮龐鴻近與日本琉球通暹
羅一髮青迷濛古城呂宋遠靄籠浮沈出沒蛟涎中海孺
古廟形崇隆雕鏤榱桷碧映彤屏張屈戌嵌玉璫恩耀
日黃金鎔庭蔭松柏兼梧桐龍蛇畫壁流春漚昌黎碑版
頌鳳穹有神爵貴踰三公千年保障憐羣蒙膏腴萬畝波

勿攻民居安堵百福總射潮不用錢鏐弓胎生卯息水族
洪代天資化庖廚供燄騰煮海紅雲烘利周鼎鬲神罔恫
神之去兮乘兩龍祥飈閃爍靈旗熊巡行洲澳職靖共下
視商賈千檣沖東達朝舞齊魯封流沙西渡波濤洶八閩
三折聲颯颯遼陽往復春歷冬平舟穩舵人無恟謳歌咸
戴神幘幘中有彩鷁如飄蓬陸離直繼波斯蹤渾天儀製
軒轅銅漏壺箭捧金衣童驗時辨刻規矩重酒器百巧呈
玲瓏爲舟爲馬爲鳴鐘靈機旋運奪鬼工織毛組羽鮫女
縫七襄鴛錦龍綃紅沈檀蘇合浮香濃珊瑚七尺誇石崇
玻璃黛椀鏤芙蓉夜珠照乘氣似虹紛紜雜沓笥笈寶充
庭列陞臨重瞳惟神呵護來無窮鯨鯢久靖島息烽沿流
妥帖排牒牕分哨會哨部伍忠神爲鞭策無疎慵童男非

女靈未終須臾導至蓬萊峯金銀臺上讌赤松六鼇背負
山龍從琴高戲水魚噉喙來朝走馬還故宮神之來兮景
瞳眬肥遺罔象恍惚逢森羅鬼怪執戟雄夜叉喫血頭豎
樓巫簫社山墮村翁馬援銅鼓敲鑿鑿舵師估客禮拜恭
黃蕉丹荔琥珀醲花磚雞骨卜吉凶肩摩踵接聲聚蜂國
家歲祀牲犧隆聿逢慶典加虔豐六師撻伐平西戎帝曰
都哉宣朕衷春帆細雨來使卿使敬告神神鞠躬謂釐海
甸臣祝融未能執殳效微功雨露寵錫驚噴聾手招陽侯
觀禮容馮夷尾入天吳從醉飽舞蹈歡忭同天威咫尺肅
且離迢遙望闕三呼嵩我昔盱眙策短筇嶽瀆廟內神明
聰玉旒驚冕垂華蟲徘徊廣廈聞鐘鏞支祁鐵絙橫復縱
湯湯洪澤濤撞椿廿年驚悸搖心胸況今溟渤川所宗扶

明倫彙編 家範典 卷一百一十六
胥赫濯神庸乾端坤倪雲翳空沐日浴月光冲融豁達
眼界開昏瞢海晏作頌時熙雍淋漓染翰元氣充豈類甕
牖嘯螭從茲破浪乘長風扶搖萬里鵬飛翺

宋楊太后陵

江皋月黑東甌天猗蘭下走悲風旋扈嬪倉皇三十六城
隅墮烏洲遺鈿間關忍死水鄉畔心驚晏駕魚龍川周家
少帝魂亦苦乘除漫說天無權雲漢梧楸青澳竹杜鵑南
向厓山哭網得魚來剖魚腹中有流離趙氏肉金鐙無處
照珠旒黃土誰人瘞脂盃臨安問寢舊龍樓知有狐狸上
春屋

訪姚芝鄉賦贈

繞屋淪漣水一渠垂楊小巷未容車杜門不拒清談客入

市貪求善本書跌宕詩篇長慶上商量人物建安初來觀
寶海新排纂坐到晴餘又雨餘

題嚴先生祠堂

暫過桐江問釣磯那知煙水有蓑衣先生原不垂綸隱休
把羊裘論是非

仲足怡然在帝廷故人忘勢帝忘形封章太史眞多事從
此難忘一客星

項里

烏騅一去里門空子弟相隨不復東作史到今尊本紀爭
功何必據關中稽山碑失秦無頌垓下歌成楚有風未許
生擒歸亦恥項王畢竟是英雄

趙一清字誠夫號東潛仁和人
有東潛詩藁

會稽道中

收拾棋枰與酒鎗溪山到處眼偏明
雨來梅子黃時候人在山陰鏡裏行
款款竹輿經野渡濛濛雲氣抱孤城
何緣得遂田居約草服黃冠作耦耕

沈大成字學子號沃田江南華亭人諸生有學福齋詩

集

詩話沃田博聞強識校定羣經注疏史記兩漢書南北史五代史通典文選說文諸書尤長音韻厯算之學亭林勿庵兩家書多所發明客諸侯與王樓山中丞恕潘敏惠公思渠尤相善詩出入唐宋杭堇浦太史謂以學人而兼詩人者信然

少林寺

初祖傳衣地莊嚴占一峯嶽雲晴入寺山月夜沈鐘林僻

來校鹿潭深卧毒龍巨姦遺墨在吾欲洗芙蓉

寺有宋蔡京書面壁

二大
字

惠州

廚傳推雄郡沙邊鼓吹鳴市橋連百艇水驛夾雙城帆遠
疑無力山多不辨名當年龍戰地過客涕沾纓

峽中夜行作

轉舵鈴羊口風吹水倒流春寒添客恨夢短起鄉愁空峽
星辰動荒江夜氣浮娟娟纖月好故傍木蘭舟

飯蘆庵贈克念講師

野水縈相抱潺湲繞寺門春陰隨客艇斜日下寒村齊已
詩名遠天台法乳存道人多妙義可許證梅魂

雨中方曼陀招同王秋汀靜思飲酒家卽事

相逢何必歎飄蓬汗漫游踪本是空雨氣遠浮江閣外嵐

光低墮酒杯中元英高唱推無敵懷祖多情訝許同漫說
輕鸞千二百年華容易棟花風

文園三兄載酒同游龍井作

異地開龍泓應接悅萬狀仁祠闢唐時結構妙意匠初墮
白雲中忽踏蒼松上窈窕轉層巖崩劣出孤嶂竹深視聽
幽苔滑行步妨爛爛明花蹊裊裊掛蘿帳抖擻躋其巔倚
闌堪寫望風來林景清日落嵐氣漲盈盈西子湖綠淨在
杯盞展席面青山支鐺溫昔釀既酣恣譚諧吾懷亦已暢
念彼辨才師說法浩無量當年羣賢游前塵宛俯仰殘碑
字模糊雲煙付幻妄良友幸招尋消搖縱天放浮生山水
緣著屐費幾兩歸途聞流泉殷耳一何壯

山塘夜泊

信宿山塘泊統如更鼓沈月光臨水動鐙影隔林深獨夜
何能醉羈人祇費吟游船歸絡繹迢遞管絃音

龍池鯽歌

龍池鯽
產六合

靈巖山陽白龍池中有神物不敢窺風雨變化產金鯽腹
腴修凸甘而肥常時獻者觸龍怒辟厯往往隨人馳歲寒
霜雪老龍蟄齧網乃敢臨淵施一尾入市一金直物少嗜

眾宜居奇猶憶童時侍膝下闌干苜蓿同嘗之

康熙甲午
先君子爲

六合學官
余隨侍

荏苒五十有餘載食指雖動杳難期今茲中孚

交卦氣旅館大雪飛如筵老夫瑟縮蠶在繭忽見銀鹿褰
書帷素鱗翕翕眼猶動柳枝脫葉橫穿腮曰此良友自遠
致主人相饋佐酒卮縱之益盎始圉圉斗升之水亦揚鬚
金鑿玉鑄吾所欲竈觚況復勞相思亟呼饗人煮冰水芼

以蔥兼薑桂滋上著白於剖良玉沾脣膩若含凝脂尤愛
魚腦及魚尾水晶碎嚼吞膠飴巷南同志招共食既醉捉
筆還爲詩馮煖彈鋏古無取蒙莊涸澈亦足嗤樂王羊舌
皆何在且徵昏禮觀爻辭

舒夢蘭字白香靖安人有白香集

詩話白香不求仕進而以和陶詩得名一時貴游折
節與交其山林詩有云漢皇并六合不能徵四皓小
儒得高第便已輕師
保慎世之意深矣

廿二日入婺源境與建侯小飲

天西日落天東霧船艤花香鳥鳴處醉中收得一衫雲攜
向天涯覓常住深杯已貯江南酒坐吮霜毫笑揮手誰家
雞犬不能仙莫使驂鸞落人後千峰萬峰攢一河婺中山
似髻鬟多蓮舟儻遇纖腰伴爲譜新詩作權歌

游宜園題壁

山禽喚我來落日催我去潺潺石上泉似共幽人語

桐江夜泊酬雙公

夜泊桐廬縣漁燈繞驛青急流喧野碓落木點疎星舟子
眠時醉鷓鴣過後腥釣臺何處是休負草堂靈

紀夢寄家弟石生

江上木末呼秋風夢中得句何怱怱丹楓白蘋圖顏色竹
谿花榭遙相通仙人有意延白日釵鳳亦欲棲青桐簾櫳
鷓鴣諱言客菊奴坐我寒香中樓欄一牋自飛墮乞余題
詠白頭翁平生未嘗識此鳥干言立就無雷同醒來但記
此一語七字莽莽殊不工重扇落葉涉冥想繁霜入幕悲
吟蟲人間此景豈易得賴有夢境爲詩筒挑燈點筆繪影

碧船窗水月方玲瓏

白下西郊

畫鷁爭官渡蒲帆逐雁羣斷橋欺遠客飛葉媚殘暝竹塢
祠靈鬼池塘養活雲西郊一徐步詩思亂紛紛

山村

山村作優戲婦子各頷倒韶護享受居翻令鳥煩惱漢皇
并六合不能徵四皓小儒得高第便已輕師保良由器識
卑何日得聞道耳目不外驚聲色等枯草養氣如洪河萬
古春浩浩乘槎入銀漢飽瞰安期棗

舟中望桂林山城

環山築城山絕奇城邊一水清漪漪舟中有人向山笑倏
已身到蓬萊池靈巖秀峯重復重碧玉削出千芙蓉造化

胡爲弄斯巧使我罷睡來追從兒時過此已知愛有如舊
書須誦背典衣溫得桂林山強似胸中添累塊

天池寺曉起看雲

居士愛雲如性命無住心中學禪定比來枯坐但焚香消
受蓮龕一聲磬夜分吟卧不易眠幽涼境中開洞天長林
虎嘯月生魄松風仍帶飛來泉山僧扣窗報雲起跣足下
牀忘一履披衣直上聚仙亭瓊芝玉葉三千里我與人間
隔此雲人間富貴徒紛紛雲端試作蘇門嘯不是仙靈不
與聞

山居夢覺

優曇欲花風籟清鶴巢籠月松枝明仙人騎杖下寥廓銀
河落耳生秋聲夢醒殘鐘隔雲斷著破雲衣身未暝沙彌

平旦報雲來呼雲入卧雲猶嬾比來高卧惟弄雲題詩戲
東雲中君百年但喜雲中住猿鳥多情定可羣

周準字欽萊號迂村長洲人諸生有虛室吟藁

詩話迂村尚志節陳恪勤繫獄時曾往從受業焉歸
思尚書門下承指授者以迂村及盛青巖顧祿百陳
經邦爲最先其後則王蘭泉王鳳喈錢曉徵曹來殷
褚左莪趙損之張策時諸人也蘭泉所述如是謂攷
詩學源流者不可不知

發朱砂庵由觀音巖登石人峯

言採黝山奇早別朱砂石升崖得險境指示已悚惕熟游
尙色變何況遠來客凌空四無倚投趾不容隙壁削緣藤
行崖傾藉人掖所憑勇往志不隨艱苦易幽巖旣已經危
峯自不隔振衣造其巔奇勝在咫尺俯身入煙蘿欲詣仙
人宅

長江萬里圖

江氣溢青練江濤走虛堂風吹江草杜若香江源萬里遙
相望我昔經行武昌岸計程未及江之半天清鄂渚見千
里惟有巴船出雲漢楚塞別來三十載披圖忽覩全蜀在
巴水盤迴控峽山拂雲帶雨蒼茫間鼉鳴蛟宮猿嘯嶺驚
浪不礙漁舟閒十二峯高如可攀雲旂恍覩神女還反思
往日游趾窄異境未極空惋惜白虎關黃牛驛引我夢魂
重挂席竹枝歌罷江天碧

行經拂水山莊

扁舟汎汎越南沙倚杖愁臨澗路斜孝穆荒齋空竹石總
持故宅尙鶯花名高那許遺纓紱情重難教棄室家太息
百年同逝水淒涼還爲惜才華

落葉歎

落葉如羈客飄零無返期秋風如解意祇傍故林吹

盛錦字廷堅一字青嶼吳縣人諸生有青嶼詩鈔

沈歸愚曰青嶼早歲詩多芳華明麗中年一變爲沈雄頓挫晚歲更趨深婉歸於敦厚與翁霽堂周迂村唱酬甚盛其詩

兼有兩君之長

詩話青嶼游跡徧南北當世賢達咸折節訂交而不屑屑於科名仕宦所爲詩從大歷諸子入手風格道上入蜀一集沈鬱頓挫尤得江山之助斷句如深竹不知路亂峯多在樓十里晴波搖睥睨一邱殘照下牛羊寫景絕工其詠老女云祇緣工擇對未敢怨無媒蓋自況也

過灘

重峽間百灘一灘度一厄江渦衆壑趨崖口亂石積大石疊竈巖小石攢劍戟中流若沸川翻倒蛟龍窟牽舟逼下流凜若阻兵革長篙拄峯腰遠纜走山脊鳴金策衆工銳

進不盈尺一絲中迸斷百里供一擲觸石無完艘沈淵有
驚魄是時雨初霽沙石多滑澤亡命爭上崖匍匐落冠烏
婦孺互扶攜雞犬任狼籍暫脫魚腹災波濤亦衽席轉思
斷鼇初四極奠磐石豈其禹力衰此境終未闢吾尤罪巨
靈何惜隻手擘天宰眞夢夢人事日偏窄波靜有潛鱗林
深多斂翮寄語營利徒勿作遠行客

盤山圖歌爲吳穎庵少京兆作

盤山鳥道千盤上漢代田疇此長往晴飛九疊康王泉翠
削千峯太華掌東接漁陽古郡開征遼唐將洗兵來中盤
突起瞭甲石絕頂平臨舞劒臺聖朝威德銷鼙鼓萬乘東
來耀神武遙瞻松柏五雲凝原廟衣冠拜列祖六龍迴駐
萬松陰黃旗翠帳連雲岑朝呼羽騎射猛獸夜勅詞臣賦

上林上林賦罷重點筆畫手吳公推第一青松萬壑捲風
濤紅杏千林烘曉日雲窗霧閣縹緲間疑有羣靈護清蹕
十幅驚溪供一掃螭頭拜獻趨朝早眞山畫山列香案信
有人工奪天巧至尊一笑促回鑾別從山外看三盤風雨
諸陵隔關塞鶯花一路接長安展親禮畢勤稽古明日經
筵進講官

雪後登黃鶴樓

獨立飛鳥際迴然身世浮人煙殘雪岸帆影大江流詞賦
空鸚鵡軒窗落斗牛乘風吾欲去家在海東頭

大別山禹廟

明德馨香地長瞻大別峯神姦蹲覆鼎追蠡落殘鐘壁篆
繁蚪蚪鱸煙護袞龍門前江漢合滾滾自朝宗

蜀道寫懷

解家動作經年別去國真成萬里游
淚眼已枯猿嘯夜鄉書空望雁來秋
蠶叢路險連雲棧鹿角灘驚上峽舟
心折江陵灌園叟黃柑千樹比封侯

高鳳翰字西園號南村又號南阜膠州人官歙縣縣丞署知縣有南阜山人詩集

宋蒙泉曰集中詩七古得蘇陸之遺自擅勝場諸體品格在中晚兩宋之間

詩話南阜以詩畫名鄭板橋最推重之自題小象云顏以唐激以昂不癡不狂亦饒亦狂是為南阜之行藏觀此則南阜之兀傲昂藏可想見矣盧抱經官兩淮運使薦其才於制府有構之者遂以結黨並干嚴劾南阜寓泰州詩云幾曾連茹茅同拔卻為鉏耰並傷又云不妨李固終成黨到底曾參未殺人皆紀實也

野鷺

黃蘆下夕陽野塘秋水冷隔岸鷺銜魚側眼窺雲影荻花
捲雪來海風吹斷梗驚起破青天殘霞紅在嶺

村晚

桐蔭下蘆簾涼亭生清樾徙倚傍前村亂蟬鳴不歇叢樹
低遠天山影青一髮原草醉夕陽歸鳥旋林沒行歌獨去
來坐上東山月

海上懷古

極目寒煙接大荒海山秋色共蒼茫風高響落鐘兒石名
潮怒聲催鼓子洋島名設險至今留楚塞沿海長城齊人築以備楚求仙
何處問秦皇馬蹏踏處情何極下盡千峯落日黃

大熱中題宋人雪蘆宿雁圖

客堂晝掩紅雲驕火龍衙衙排空燒樹頭不動焦欲禿喝

禽坐樹愁鬱陶忽然有客叩門至手提數幅生鮫綃飛煙
散霧張四壁指顧一一忘疲勞就中一幅尤奇絕荒汀野
岸風蕭騷殘蘆半折溪色凍霜花雪氣橫清宵下有羣雁
宿沙嘴三三兩兩紛爲曹江南江北夢寒雨銜蘆何處凌
穹霄人生寄跡亦如此鴻泥轉眼迷江湖意外餘閒妙點
綴更掃墮羽窮芒毫委沙拂雪欲飛動風來疑逐簾鬚飄
邊鷺崔白不在眼世間餘子空自豪摩挲瞪目噤不語當
頭似有寒泉澆尋常頗怪北風安此時眞覺森顚毛呼童
掃地拂竹簟支頤卧對霜天高

野泊

石頭城外放船行野泊荒灘欲二更露下平沙聞雁語月
明春水看潮生上元節候餘村鼓薄宦心期付酒觥滿眼

升沈直底事海邊鷗鷺久寒盟

太初古甃鑿硯歌

侏儒飽死臣飢死老朔殿上呼天子稽首頓首玉階前玉
花一片隨朔起流傳人代入吾曹刮垢磨光見肌理蟠雲
鬱作葡萄圓簾簾累垂萬顆紫斷角殘印半未眞太初之
字猶可指雙題并行紀宮名宮宇空存亡其尾摩挲對客
發長吁此君闕人應多矣圻痕嚙土蝕古花幾入荒墳幾
戰壘我鑿作硯伴書生不珣不琢存其始貯墨一石飽霜
毫斗酒猶堪注漢史

門前

聊爾將扶去衡門一暫臨雁聲秋意迴人語夕陽沈變滅
看雲眼蒼茫袖手心惟餘雙嶺舊迢遞下暝陰

上官周字文佐號竹莊長汀人有晚笑堂集

詩話竹莊以畫名詩風格適上

過小石樓有懷張穆之

羅浮春早淡煙籠離合由來氣自通
荒徑乍開晴樹綠
曉鷺新破曉窗紅
奇峯另削留名迹
臺榭深沈有晉風
惆悵素懷情未已
鐵橋人去石樓空

方士庶字洵遠江都人有環山詩鈔

詩話小師道人畫學出於黃尊古而精詣過之論者謂假年深造可參四王之席詩亦蘊藉其畫收入內府石渠寶笈坐久月當戶一詩曾題入梧桐秋月冊中所謂詩中有畫也

秋夜盼兒子家書不至

坐久月當戶露涼侵鬢絲
江湖新雁少游子遠書遲
拂簾不成夢倚欄無限思
螢光忽明滅已近授衣時

甲寅九月南堂先生歸里計日抵家見憶代書

去日旅愁盡歸時樂事偏秋餘黃葉後人到菊花先城郭
驚鄉土妻兒說墓田從來爲客久此別只經年

汪士慎字近人號巢林江都籍歙縣人有巢林集

詩話巢林墨梅氣韻高潔如其爲人性嗜
茶詩集卷端繪啜茶小像可想見其雅尚

吳氏家藏十三銀鑿落歌爲蔚洲賦

東城雅會延陵家丹黃繞座開秋花賓朋半是南帆客貧
簪影裏浮流霞酒酣主人興復作呼取盤盂重勸酌明鐙
閃閃古匣開著手光流銀鑿落銀鑿落十有三記得先世
觴賓客一觴一詠恣歡談到今歲月留傳久世世珍藏勝
瓊玖玉壺酒滿瀉紅雲香沃芙蓉光在手或爲癡鼎形或
作雲雷象玲瓏花卉各逞妍玉璽素磁同雅賞一飲再飲

客顏丹長歌短歌如狂瀾玉山欲倒金樽翻花陰月色移欄干

閔華字玉井號廉風江都人有澄秋閣詩集

詩話廉風詩數與唐沈南野稱其佳句如孔北海祠云要爲魯國奇才子不比楊家最小兒謝太傅祠云且喜生兒能破敵不妨長日但圍碁則已駸駸入宋矣

雨宿江口

蓬背雨瀟瀟併入江流響夜久覺船移知有春潮上

晚步劍池

鳥宿人未宿夜語空山清星自池底見僧從林杪行悠然磐石上坐待寺鐘聲

下堯峯

上堯峯接下堯峯石路無塵滿谷松行盡清溪人不見萬

修篁裏一聲鐘

焦山觀音巖晚望用宋人趙冰壺韻

捫讀冰壺句尙存虛亭人坐水雲昏沙頭一雁叢蘆沒江
上千峯落日吞掃葉深林逢白足扶藤危磴引青猿茫茫
目送東流去終古潺湲漱石根

錢夢鈴字祚賢號五峯嘉善人諸生有補巢書屋集

詩話五峯續學不遇有論以絕句八十首知人論世
頗微心得詩癖香初白冲和平正晚歲病目失明後
詩境轉進彈丸脫手舒展自如
其追摹查氏不徒優孟衣冠也

詠塵詠影和敬業堂集中韻

一片空濛著物輕探尋無跡聽無聲從教塵尾揮難盡聚
向輪蹄看不明總爲多情生步襪未能免俗惹冠纓劫灰
與爾長終古東海滄桑問幾更

起滅何從證宿因
鏗前月底動相親
悟禪尙著空中色
妙筆難摹畫裏神
萬物有形皆泡幻
一腔無我是天真
未須拂拭菩提樹
苦向身心索解人

抵金陵連日大雪奇寒

一帶西南巷陌喧
城隅東北最蕭寒
只饒雪意存公道
白屋朱樓一例看

自題四科薦卷後

雕文有如鑄劍器
爭時不爭鈍與利
又如風花下上飛
或飄茵席或墮廁
文章莫與時命爭
著作故須借聲勢
國門不敢擅增刪
重是煌煌丞相製
老生常談何足珍
敢望三練酬一字
諠囂貽笑亦奚爲
葬汝梓州兜率寺

補巢書屋歌

擇居有如鳥擇巢脫彼幽谷遷於喬我生鍛翮頻飄飄西
飛燕子東伯勞初從蕭林陟東皋鵲巢暫作鳩居僑七年
寄跡如萍飄竭來此地重誅茅羽譙譙兮尾脩脩爾室幸
免風雨漂室中有子取鵠梟漫漫長夜時嗚噪兩三雛羽
猶穉嬌傍母索哺聲嗷嗷老烏覓食暮復朝俛喙墮芷仰
銜茗倦羽飛渡長江潮漂泊湖海非游遨歸飛不爲驚弓
逃兩翼損折難翱翔縮頸曳尾伏林梢一枝猶喜穩鷦鷯
君不見羽山文雉中旌旄弋者挾彈彎烏號故巢回首牖
戶拋又不見西江單鵲摩青霄攫繳忽墜層雲高故巢回
首林木焦嗟哉兩禽具奇毛禍機竊發徒自招何如空谷
長逍遙偃仰不用嗟無聊丹山阿閣讓九苞弗復矯首搏
扶搖噫吁嘻弗復矯首搏扶搖

補和曹六圃永宇溪莊編籬詩

身世翩然蝶翅輕
坦懷直令險途平
劃沙不礙花聯脈
編竹仍邀月漏明
藥圃朝晴銷席曬
秫畦秋雨帶經耕
柴桑風味君能續
要與東籬一樣清

朱碧山銀鑿落歌

玉魚金盃埋山阿
龍泉寶鼎沈長河
連環斫斷唾壺缺
古物人世旋消磨
咄哉茲樽不墮劫
屹如碩果懸高柯
溯源造自至正歲
遙遙五百年中過
當時渭塘碧山老
神技起絕工
研摩鑄金不用入
煅煉既追復
琢還加磋槎枒倩作
卧龍象
霜鱗銀甲橫滄波
首尾起伏得形勢
枝節輻輳蟠青螺
脊背箕踞尋源使
飄然髯鬚紛婆娑
彭亨大腹洞無物
容得醪醑三升多
五言短句六字贊
鉤勒一一精無訛

雅製曾落名士手當筵醕罷歡顏酩江村學士題品貴黃金
倍價難搜羅竹垞秋錦尤寶愛淋漓醉墨銀槎歌當湖
構李不復作縱有神品誰摩挲吾生何幸與賞識驚歎無
已吟還哦何當金龜換美酒一醉千日回天和乘風蕩漾
碧海去直抵西極尋羲娥

瓶山古瓶歌

劍鋒劈破雙玉斗如意擊缺唾壺口汾陰寶鼎埋深淵禹
廟金鐘蟲齧紐古物厯劫難自存玉碎金融況瓦缶瓶兮
爾本搏土成何當完善落人手蒼然古色苔蘚斑掘地得
自山麓間一邱今作黃冠宅舊是官家榷酒關想見當年
挹注時髻墾薜暴無妍姿棄擲堆垛不甚惜甃以磚石成
屋屨或云此物有神護瓦礫堆中尙完固腹貯松醪味不

渝口含薜荔顏非暮此語信否吾不憚重是昆明灰劫遇
吾聞光堯內府法物傳汝定官哥陶器全遍體光砢捫其
邊青銅裏之色焉然旋遭兵燹驚烽煙零落風塵散市廛
斯瓶無分供御前不材翻得終天年運會遷移時代久承
平出世良非偶居然寶物兵留遺玉盤礫盃堪爲友吾將
佐以赤壁之匏樽配以子雲之醬瓿不須七椀玉川茶常
泛三升桑落酒

張錫爵字擔伯一字中巖嘉定人貢生有吾友于齋詩

鈔

沈歸愚曰徵君張樸村先生每稱宗子擔伯能以詩
鳴南華張檢討亦云然朱荊亭述之尤詳余假歸息
影湖濱擔伯以詩鈔寄屬爲序讀之淵靜演迤情
餘於文凡擔伯所言皆前人所欲言而未嘗言者
詩話擔伯規撫漁洋集中論詩絕句三十首語多平
允於書畫名蹟題詠亦具有鑒裁筆力健拔蘭泉湖

海詩傳猶采
之未盡也

報國寺雙松歌

五丈一搜煙雲寒十丈一折雷雨蟠
電光煜煜燒簷瓦鱗爪僵凍雙龍
眠干霄無心故垂地橫空忽放窮
幽燕幹擎漠北盡蕭艾影排闥闔
迎神仙風迴霧黑夜吟嘯桑乾倒
捲流潏潏祇愁掀舞怒騰上殿庭
搖蕩無遺椽不然道人三昧力呪
水降制長蜿蜒何爲神物易翔躍
鼓鐘相聒殊安便我來名藍正無
事支筇仰面閑留看巨櫟盤盤陰
蔽野樓桑矯矯光參天豈如茲松
鎮禪窟斤斧不到青銅堅上方花
雨作膏沐元鶴來往相周旋葆眞
完樸事非易咄哉千載形神全老
僧導我歷高閣秋空景物開澄鮮
塵收日霽見負戴蘆溝車馬如奔
川百年泡影一轉瞬安能巢

此還燒鉛松肪煮罷竟飛去洪崖子晉聊隨肩吁嗟學道
吾已晚明朝且上西山巔

題宋比玉八分書冊子後

暴秦燔經多獄訟書趨便易隸乃興建初飾隸作楷法義
取八字分成形篆八隸二相割取俗流僞託言難憑毛弘
祕書教自漢鍾繇銘石看飛騰有鄰擇木擅唐代字體與
漢原相承彌勒像碑少筆法百金一字知虛稱珏也工書
值明季奮筆俯仰縈回輕煙飛雲逝斷還續山顏雨驟縱
復橫屹如鐘簏懸重宇翩如鸞鳳翔青冥上谷二難頻展
玩衙齋風日何幽清侯豫瞻雍瞻雨先
生觀於西江官舍流傳距今越百載
紙墨完好光熒熒吾聞珏也不羈士主文譎諫能詩鳴荔
枝仙人早自號路逢程老謂松呼以兄小鸞長裾日捧硯

濁醪數斗傾盆罍興酣入分誇入妙淋漓素壁兼秋屏宜
官酒舍漫償值魏武別館閒施釘珪也此書與之敵纖波
濃點猶前型北走燕山東吳越抱琴子子歌榛苓故園荔
熟不歸去桐棺旅殯吁可矜從來盛名多坎壈題詩望古
心怍怍

王麓臺少司農畫山水

山吐秋雲雲瑣樹閣浮溪水水生漪遙天一抹青如黛恰
是新涼過雨時

張四科字詰士號漁川臨潼人貢生有寶閣堂集

厲樊榭曰漁川詩刪削靡曼歸於騷雅其研詞
鍊意以樂笑翁爲法讀響山編覺白雲未遠也
詩話漁川僑居揚州得隙地於天甯寺旁築讓圃與
馬解谷昆季行庵爲鄰並有竹木亭館之勝互集詩
証一時名流觴詠所聚風雅好事兩家蓋如駉斯漁
川詩格甚正意境不凡雖才力未盡變化要是雅音

集中客有談故將軍事一詩乃爲
年雙峯作所云客卽胡復齋明恆

靳祿

南山道新雪落日長林皆有客
逐麀至遇盜方殺人義憤
一以激衆寡甯所論箭如餓鴟叫
始各鳥獸奔惟餘一女
子泣拜不成言自慟遭剽劫分與黃壤親
何緣鬼伯手奪得未絕魂卻顧此身外
何以酬斯恩黃者金滿籬白者麥滿園
拂衣去弗應歛越銅人原歸來掩關卧
飢腸如轉輪客固飲博徒作橫鄉里嗔
忽焉赴急難猶謂血氣振終乃不望報
此足愧縉紳三老上其事頌者萬口喧
縣令始亦喜擬請旌其門訪諸老博士
謂匪素行純四境多椎埋況可使上聞
吾聞爲政要求備不一身居上示所嚮
厥下庶克循殺一警且百舉善遠不仁
俗吏乃罔識安議惟搖脣

作詩待詢采直質不沒眞此客曰斬祿櫟陽村中民

雪後登汝州望嵩樓

嵩高山頭玉旆出世界盡被瑤華封三花二室不到眼鎮
日閉置檐車中汝濱客舍雞上距默念此願何由從渴來
北樓試縱眺隱約聽得伊陽鐘迴風忽捲雲蓬蓬樹梢殘
照開洪濛青天櫛比卅六峯一一削玉攢芙蓉平田綠白
百里近滲金樓觀明深松正如蓬萊隔清淺三山縹緲凌
虛空招招笙鶴惜不下便欲往問浮邱公平生肚觀推第
一山靈似與精誠通坡仙去官詫海市昌黎南歸禱祝融
微生敢望千載上斯境瓌異將無同少焉嶺缺吐圓月霜
采照耀新磨銅闌干拍徧叫奇絕酒錢未辦殊怱怱歸來
氣豪壓東野安用盤渦訪石龍

題楊吳潯陽長公主墓誌拓本後

廣陵妖亂將甯息天遣楊吳留霸跡生男肯作節度使生
女猶蒙湯沐邑潯陽公主亦天人歐史空繙未著聞一抔
莫問殯宮地千載惟傳諛墓文盡說西華門外叟揮鉏劇
出貞珉厚吳牛礪角落誰家剡藤脫字歸吾手迴環誦之
劇可憐存歿哀榮事宛然埋香空記興甯里凋薳還題順
義年下嫁彭城應鼎族隨宦名州屢紆轂劉郎家世亦無
徵合在英雄三十六摩挲往事閒窮究李花又落楊花後
不見永興遭篡時聞呼公主輒含悲亦有芳儀陷强虜傷
心萬里望南箕流落沈淪同斷梗如爾全歸實天幸銘幽
猶得似承平地下芳魂應亦省休因翠墨感興亡矮本空
齋手自裝堪配汝南墓誌稟臨池開處各生香

余舊藏虞
秘監汝南

公主誌
稟真蹟

松寥閣坐雨

海上風雨來不見雙峯顛
經窗犯曉啟萬態紛目前
風起江色黑雨過山光鮮
風雨自變幻江山故依然
默與道心契靜結滄洲緣
終期謝塵鞅高詠釣竿篇

夕陽

惆悵西窗景易沈更憑高閣散幽襟
寒鴉古木無邊好極浦遙山一半陰
黯黯最愁長路客駸駸偏感暮年心
晚晴記得樊川賦獨立蒼茫擁鼻吟

與宗人某話舊

故里元正會祀同夕陽飲獵記恩恩
馬前錦雉援弓墮河上湄桃對酒紅
頻歲離憂頭有雪當時豪氣耳生風
可堪

多病松楸遠長作江湖聽雨翁

客有談故將軍事者賦之

酒酣雙耳熱復典鸛鷄裘看君颯華髮意氣尙莫傳昔事
大將軍萬里從軍游星馳青海戰電卷黃雲愁掃除王庭
空指顧胡命休成功獻天子開國冠諸侯豪貴讓絕席卿
相拜馬頭勢等山嶽崇權將人主侔此時亦受賞仍參幄
中籌微諫愧伍被游揚希曹邱門生半天下資貨溢九州
武安益驕橫淮陰無反謀由來功名盛容易生瘡疣天子
終見疑廷尉俄來收冰山一朝摧敵國起同舟盈庭對獄
吏獨蒙脫繫囚赫赫顯要地昔人戒輕投炙手雖可熱失
足易起羞臨事苦不愼過時空自尤於今年七十不醉復
何求

登甘泉山

近郊莽平楚，崇陵表步仞。邈爾蓄雲雨，歸然作固鎮。憩澗
希白石，升阪遺喬林。塵居夙鶴望，霞標若瑤岑。層邱旣斗
迴，陰岡亦宿列。振衣陟其顛，北風將暮雪。目存漢王墓，想
屬陳公陂。古人雖已矣，警余千載懷。

泛南池

蒹葭秋水棹，忘歸回首春。風酒伴違若，是機心猶未盡白。
鷗應亦背人飛。

天河

經天惟顯氣，行地是餘波。不假月明色，自然秋思多。迴連
雲影動，寒壓雁聲過。便擬乘槎問，星期定若何。
晚晴移詩匯卷七十八終